

Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja

fax: + 387 33 552 810
 selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja

fax: + 387 33 552 810
 dzenita@sogfbih.ba

Sadržaj biltena:

Za izgradnju 16 poslovnih zona Vlada FBiH osigurala 1,5 mil.KM	1
Delegacija Općine Bihać posjetila Kakanj	2
Potpisan ugovor o stručnom nadzoru projekta vodosnabdijevanja u općini Čapljina	2
B.Krupi grant od 1 mil. eura za sanaciju deponije	3
Travnička Plava voda će napajati pet općina centralne Bosne	3
Bihać u IPA projektu održivog upravljanja turizmom jadranske baštine	4
Općine Bihać i Tuzla izabrane za regionalne centre u okviru GOLD projekta	4
Potpisan protokol o saradnji između Vojvodine i Tuzlanskog kantona	5
Švedska Sida pomaže ekološki projekat u Stocu sa više od 200.000 €	5
Jablanica dobila kamino 'autosmečar'	6
Zenica prva u BiH priprema geo-informacioni sistem za praćenje klizišta	6
Otvorena aplikacija za napredni međunarodni trening program za lokalne liderke	6
Najava obilježavanja dana općina za mjesec februar/veljača	7

Bilten Saveza općina i gradova Federacije Bosne i Hercegovine

ZA IZGRADNJU 16 POSLOVNIH ZONA VLADA FBiH OSIGURALA 1,5 MIL. KM

Federalni ministar razvoja poduzetništva i obrta, Sanjin Halimović i načelnici 16 općina u Federaciji BiH su u ponedjeljak, 20. januara/siječnja, u Vladi FBiH u Sarajevu, potpisali ugovore o poticaju jedinica lokalne uprave za uspostavu i izgradnju poduzetničkih zona, navodi se na web stranici Vlade FBiH.

Ugovore o poticajnim sredstvima potpisali su načelnici i predstavnici općina Stolac, Gračanica, Gradačac, Gornji Vakuf - Uskoplje, Novi Travnik, Posušje, Tešanj, Kiseljak, Tuzla, Bosanski Petrovac, Ravno, Tomislavgrad, Orašje, Grude, Doboju i Ilijaš.

Ministar Halimović je izjavio da je za poticanje lokalne uprave na izgradnju poduzetničkih zona radi stvaranja preduvjeta za razvoj malih i srednjih poduzeća i otvaranje novih radnih mjesta na prostoru Federacije BiH u posljednjih devet godina izdvojeno 14,3 milijuna KM za izgradnju 60 poduzetničkih zona u općinama Federacije BiH, a u ovoj godini za te namjene je predviđeno ukupno 1,5 milijun KM. „Posebno bih istakao organiziranost i dobru uspostavu nekoliko zona kojima smo i mi sa nivoa Vlade Federacije BiH pomagali, a to su industrijske zone u općinama Orašje, Tešanj, Zenica i Livno, a jako dobre su i industrijske zone u Bihaću i Sanskom Mostu“, istakao je Halimović dodajući da će sve lokalne zajednice koje dosad nisu koristile sredstva ovog resornog ministarstva moći već od idućeg mjeseca aplicirati iz budžeta za 2014. godinu za ovaj i slične programe.

Federalno ministarstvo razvoja, poduzetništva i obrta je, po njegovim riječima, osim programa u poticanju industrijskih zona u lokalnim zajednicama raspisalo još 12 različitih programa među kojima oni koji se odnose na podršku novoosnovanim subjektima male privrede na području FBiH i podršku u poduzetništvu mladih i žena.

Poticaj izgradnje poduzetničkih zona u FBiH je jedan od 13 projekata koji su financirani od ovog resornog ministarstva u okviru javnog natječaja u 2013. za poticanje razvoja malog gospodarstva u Federacije BiH.

Na javni natječaj Federalnog ministarstva razvoja, poduzetništva i obrta u 2013. godini, za projekt izgradnje poduzetničkih zona prijavile su se 44 općine, od kojih je njih 16 zadovoljilo uvjete tražene u natječaju i dobili su ukupno 1,5 milijuna KM.

Načelnica Općine Doboju Jug Jasminka Begić, te načelnici općina Tešanj Suad Huskić, Orašja Đuro Topić, Ilijaša Akif Fazlić i Bosanskog Petrovca Zlatko Huić izrazili su zahvalnost resornom ministarstvu što je prepoznalo njihove projekte i omogućilo ulaganje u poduzetničke zone njihovih lokalnih zajednica čime se doprinosi očuvanju postojećih i otvaranju novih radnih mjesta i poslovnih aktivnosti.

Dodjela poticajnih sredstava za poslovne zone, kako je istaknuto, dodatno je animirala općinske strukture da pokrenu ili ubrzaju svoje planirane aktivnosti na uspostavi ili razvoju poslovnih zona tako da danas u tim zonama postoji značajan broj privrednih subjekata.

Federalno ministarstvo razvoja poduzetništva i obrta, istaknuto je nakon potpisivanja ugovora, kontinuirano potiče jedinice lokalne samouprave oko uspostave i razvoja poduzetničkih zona u Federaciji BiH.

Dosadašnja dodjela bespovratnih (grant) sredstava se odnosila za izradu strateško-planskih dokumenata koji su neophodni prilikom osnivanja izgradnje poslovnih zona i za sufinansiranje infrastrukturnih radova u zonama. Ove aktivnosti se svake godine planiraju i provode počev od 2004. godine.

Federalno ministarstvo razvoja, poduzetništva i obrta nastavlja aktivnosti na uspostavi i razvoju poduzetničkih zona u Federaciji Bosne i Hercegovine. Za ovu godinu Ministarstvo je, u suradnji s nadležnim kantonalnim ministarstvima i jedinicama lokalne uprave, planiralo nastavak aktivnosti oko uspostave novih zona, ali prevashodni cilj je stavljanje u funkciju onih poduzetničkih zona koje su u fazi izgradnje s čime bi se povećao broj korisnika u zoni i direktno doprinijelo povećanju zaposlenih u Federaciji BiH.





Grb Općine Kakanj

DELEGACIJA OPĆINE BIHAĆ POSJETILA KAKANJ



KAKANJ, 23. januar/siječanj – Načelnik Općine Kakanj Nermin Mandra i predsjedavajući Općinskog vijeća Slaven Katičić, primili su jučer delegaciju Općine Bihać na čijem čelu su bili načelnikom Emdžad Galijašević i predsjedavajući Općinskog vijeća Roman Jurić, javljeno je iz pres službe Općine Kakanj.

Na prijemu su razmijenjena iskustva u pogledu osiguranja pogodnosti za investitore, jačanja privrede i općenito lokalnog ekonomskog razvoja. Goste iz Bihaća posebno je interesirao set propisa koje je usvojilo Općinsko vijeće Kakanj s ciljem jačanja

poduzetništva u Kaknju, otvaranja novih firmi i novih proizvodnih pogona, te zapošljavanja i samozapošljavanja.

Gostima iz grada na Uni pojašnjeni su hronološki svi događaji i aktivnosti koji su rezultirali dolaskom prvih investitora u Kakanj nakon poduzimanja niza stimulativnih mjera, od usvajanja pogodnosti za investicije, otklanjanja administrativnih barijera, kampanje medijskog predstavljanja pogodnosti, do pretvaranja općinskih službi u istinske servise za investitore, dodjele zemljišta za izgradnju proizvodnih pogona po povoljnim uslovima tj. po cijeni od 1 KM za metar kvadratni zemljišta, plaćanja troškova osnivanja novih firmi itd.

"Ovaj susret je organiziran na naš zahtjev iz razloga što su evidentni pomaci u Kaknju u proteklih godinu dana, posebno u oblasti privrede, a to nas u Bihaću zanima. Glavni i osnovni problem, ne samo Općine Bihać, je velika nezaposlenost. Mi tražimo rješenja kako privući investicije, a ne samo deklarativno pričati. Zanimala nas je poslovna zona ovdje u Kaknju. Ovo sve što se dešava, ovih četiri-pet fabrika koje će se otvoriti u Kaknju, mi to želimo na sličan način uraditi u Bihaću. Znači, razmjene iskustava treba, posebno između načelnika. Od ovoga što smo čuli u Kaknju, mi ćemo sigurno nešto od toga primijeniti, a siguran sam da se i nešto od našeg iskustva može prenijeti iz Bihaća ovdje u Kakanj", izjavio je Emdžad Galijašević, načelnik Općine Bihać.

Osim razgovora o aktivnostima na privlačenju investicija, razgovaralo se i o iskustvima u pogledu poboljšanja efikasnosti rada općinskih službi, u pogledu punjenja općinskih budžeta, ulaganja u infrastrukturu i sport, itd.

Upriličen je i obilazak Poduzetničke zone "Vrtlište", a potom i lokacije u Ričici gdje se odvijaju pripremni radovi za izgradnju fabrike peleta, te je upriličen susret sa predstavnicima menadžmenta Tvornice cementa Kakanj i obilazak proizvodnih pogona ove kompanije.

(Tekst u cijelosti možete pročitati na web stranici Općine Kakanj: www.kakanj.com.ba)



KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.chc-bih-mne.org
www.srb-bih.org
www.chc-cro-bih.net
www.programmed.eu
www.tacso.org
www.euroinfoceantar.ba
www.balkanfund.org
www.eurelmed.com
www.eacea.ec.europa.eu



Grb Općine Čapljina

POTPISAN UGOVOR O STRUČNOM NADZORU PROJEKTA SISTEMA VODOSNABDIJEVANJA U OPĆINI ČAPLJINA

SARAJEVO, 17. januar/siječanj – Općina Čapljina potpisala je sa španskom firmom "Eptisa" ugovor o stručnom nadzoru cjelokupnog projekta sistema vodosnabdijevanja u Čapljini, koji uključuje dva lokaliteta, odnosno dva dijela – dio Dubravske visoravni i dio Trebižat-Prčavci-Zvirovići, navodi se na web stranici Općine Čapljina.

Ugovor je vrijedan 270.350 eura, a potpisom započinje realizacija dugo očekivane druge faze projekta vodoopskrbe općine Čapljina.

Već ranije potpisan je ugovor sa izvođačem tendera broj 1., koji se odnosi na glavne transportne cjevovode, a potpisom ovog ugovora nadzorni organ će u radove uvesti navedenog izvođača, čime će na terenu krenuti realizacija projekta.

U ime općine Čapljina ugovor je potpisao načelnik općine Čapljina Smiljan Vidić, a u ime firme "Eptisa" Alvaro Diez, generalni menadžer "Eptise" za Jugoistočnu Evropu.

BOSANSKOJ KRUPI GRANT OD MILION EURA ZA SANACIJU DEPONIJE

BOSANSKA KRUPA, 14. januar/siječanj – Općina Bosanska Krupa je jedna od četiri općine u Federaciji BiH koja je dobila grant kroz projekt IPA 2011 kandidovanog preko Federalnog ministarstva okoliša i turizma, a koji se realizuje preko Svjetske banke.

Sredstva u iznosu od milion eura bit će utrošena na sanaciju deponije Krivodol i to je projekt koji je Općina Bosanska Krupa još prije četiri godine delegirala Federalnom ministarstvu. Tim povodom, danas je u svom kabinetu načelnik Općine Bosanska Krupa Armin Halitović ugostio pomoćnika federalnog ministra Murisa Hadžića i predstavnika Svjetske banke Nikolu Kerletu.

Na radnom sastanku kojem su prisustvovali načelnikovi saradnici i direktor JKP „10. Juli“ Nijaz Tatarević razgovaralo se o koracima implementacije projekta vrijednog milion eura, kao i mogućnostima za kvalitetno rješavanje trenutnog odlagališta otpada na lokaciji Meždre - Vlaški Do.

Prvi korak u realizaciji projekta koji se odnosi na sanaciju, odnosno zatvaranje deponije Krivodol jeste formiranje općinskog tima koji će provoditi kompletan proces.

Sanacija deponije Krivodol jedan je od najskupljih projekata u proteklih dvadeset godina na prostoru općine Bosanska Krupa. Njegovom se realizacijom u priči o ekologiji, okolišu i turizmu „okreće list“ i ulazi u novo poglavlje koje govori o čišćoj, zdravijoj i ljepšoj Bosanskoj Krupi.

Nakon razgovora u prostorijama Općine Bosanska Krupa, gosti su s načelnikom Arminom Halitovićem obišli teren kako bi dobili sliku stvarnog stanja.



TRAVNIČKA PLAVA VODA ĆE NAPAJATI PET OPĆINA CENTRALNE BOSNE

SARAJEVO, 11. januar/siječanj – U Sarajevu je danas održan sastanak premijera Federacije BiH Nermina Nikšića sa načelnicima općina Travnik, Novi Travnik, Vitez, Busovača i Zenica, premijerima Srednjobosanskog i Zeničko-dobojskog kantona, predstavnicima Federalnog ministarstva za poljoprivredu, vodoprivredu i šumarstvo, direktorom Fonda za zaštitu okoliša FBiH, direktorom Javnog fonda sliva rijeke Save i direktorom Regionalnog vodovoda Plava voda.

Ovom prilikom je prezentirana mogućnost ukupnog kapaciteta izvorišta Plave vode i mogućnosti djelimičnog iskorištavanja ovog vodnog resursa uz posebnu notu zaštite i raspodjele kapaciteta ovog izvorišta. Posebno je potencirano očuvanje okoliša i očuvanja lokaliteta izvorišta i Travnika kao grada kojem je jadan od pečata upravo Plava voda, navodi se u saopćenju press službe Vlade ZDK.

Razgovaralo se o iskorištavanju dijela kapaciteta Plave vode za vodosnabdijevanje općina Zenica, Travnik, Novi Travnik, Vitez i Busovača.

Dogovoreno je da će u konstrukciji finansiranja zainteresovane općine, izuzimajući Travnik, obezbijediti polovinu potrebnih sredstava za izgradnju ovog zajedničkog sistema vodosnabdijevanja. To je iznos od ukupno 40 miliona maraka. Općine će se kreditno zadužiti ukupno 20 miliona maraka, a kantonalne vlade će obezbijediti drugu polovinu putem svojih budžeta iz dijela sredstava vodnih naknada. Federalna Vlada će finansirati razliku potrebnog novca.

Kredit je predviđen na otplatni plan od 15 godina sa grejs periodom od tri godine.

Projekt je jednoglasno podržan, a federalni premijer Nikšić je prihvatio da se proglasi javnim interesom od značaja za Federaciju BiH kako bi se omogućio skraćeni postupak obezbjeđenja sredstava iz federalnih fondova.

Projekat, što je vrlo važno, predviđa pored izgradnje cjevovoda, uređenje kompletnog vodozahvata izvorišta Plave vode sa stanovišta okolišnog regulisanja i zaštite od potencijalnih zagađivača sa platoa Vlašića pa je predviđeno regulisanje kompletnog kanalizacionog prstena za zbrinjavanje otpadnih voda sa izletišta na ovoj planini.

U povodu postignutog dogovora kantonalnih i općinskih predstavnika i uz saglasnost predstavnika federalnih institucija i vlasti oko djelimičnog iskorištavanja izvorišta Plava voda za snabdijevanje vodom pet općina premijer Zeničko-dobojskog kantona Munib Husejagić je izjavio:

"Ovo je za mene veliki, završni čin naklon 30 godina pokušaja dovođenja pitke vode u Zenicu sa ovog izvorišta. To znam jer sam i sam učestvovao u pokušajima koji nisu za ishod imali uspjeha. Ovo je rješenje za narednih dvije stotine godina za Zenicu i njene građane. Ovo je prvi put da je investicija i njeno zatvaranje realno postavljeno uz učešće svih zainteresovanih aktera i sve govori da imamo puno razloga da vjerujemo da ovaj projekt može uspjeti. Posebno je važno da je postignuta jednoglasnost u dogovoru oko ovog projekta".

Vrijedno je napomenuti da je Javno preduzeće Plava voda već formirano i uveliko priprema sve za početak velikog posla. Sudskim putem je oduzeto pravo koncesionaru nad Plavom vodom, austrijskoj firmi koja je procjene regionalnog vodovoda za pet općina bazirala na iznosu od oko dvije milijarde maraka, navode iz Vlade ZDK.



Sastanak načelnika Halitovića sa saradnicima i direktorom JKP "10.juli"



"Dogovoreno je da će u konstrukciji finansiranja zainteresovane općine, izuzimajući Travnik, obezbijediti polovinu potrebnih sredstava ...To je iznos od ukupno 40 miliona maraka. Općine će se kreditno zadužiti ukupno 20 miliona maraka, a kantonalne vlade će obezbijediti drugu polovinu."



Grb Općine Bihać

KORISNI LINKOVI ZA PREDPRISTUPNE
FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.chib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmed.eu
www.tacso.org
www.euroinfoceantar.ba
www.balkanfund.org
www.eurelmed.com
www.eacea.ec.europa.eu

"Vrijednost projekta je 25 miliona dolara i ima za cilj promovisati integrisano i sveobuhvatno planiranje lokalnog ekonomskog razvoja i realizaciju aktivnosti između općina, kantona i entiteta u sektorima sa najvećim potencijalom za brz, održiv rast novih radnih mjesta."

BIHAĆ U IPA PROJEKTU ODRŽIVOG UPRAVLJANJA TURIZMOM JADRANSKE
BAŠTINE

BIHAĆ, 15. januar/siječanj – Općina Bihać zajedno sa Razvojnou agencijom USK-a, Vladom USK-a i Zavodom za zaštitu kulturnog naslijeđa uskoro će početi sa implementacijom projekta "HERA" – valorizacija kulturnog naslijeđa starog grada Sokolac. Riječ je o sastavnom dijelu projekta održivog upravljanja turizmom jadranske baštine kojeg je RA USK-a započela 2014. godine a u koji je uključeno šest zemalja i devetnaest partnera. Ukupna vrijednost projekta je 17.294.626,74 KM, a finansijski je podržan od strane Evropske unije putem IPA – Adriatic fonda.

Razvojna agencija USK je, u sklopu ovog međunarodnog projekta, uspjela osigurati investiciju na području Unsko-sanskog kantona, preciznije u općini Bihać, u iznosu od 626.672 KM. Direktni cilj ove investicije je sanacija starog grada Sokolac i izrada turističke signalizacije, a sve u cilju njegovog stavljanja u funkciju turizma i samim time unaprijeđenja turističke ponude USK. Indirektni cilj, koji će se postići implementacijom ovog projekta, jest podrška sektoru malog i srednjeg poduzetništva u vidu stvaranja prilika za unprijeđenje poslovanja i stvaranje novih radnih mjesta u sektoru turizma, kaže Haris Komić, direktor RA USK.

Hamdija Lipovača, premijer USK-a ističe da su Sokočani zaslužili ovaj projekt svojom proaktivnošću u kreiranju i realizaciji projekata te zalaganjem za očuvanje starog grada koji je, ne samo jedan od prepoznatljivih simbola Bihaća, nego i dio kulturne baštine Bosne i Hercegovine. Današnjoj prezentaciji projekta saniranja starog grada Sokolac i izrade turističke signalizacije s ciljem stavljanja ovog jedinstvenog historijskog objekta u turističku promociju grada, prisustvovao je ispred Općine Bihać i Smail Toromanović, savjetnik Općinskog načelnika Bihaća.

Sa prezentacije projekta saniranja starog
grada SokolacOPĆINE BIHAĆ I TUZLA IZABRANE ZA REGIONALNE CENTRE U OKVIRU GOLD
PROJEKTA

Općine Bihać i Tuzla su, u konkurenciji 144 općine u Bosni i Hercegovini, izabrane zajedno sa još pet općina u BiH za centralnu lokaciju u kojoj će se realizirati Projekat unapređenja lokalnog razvoja (GOLD), kojeg zajednički finansiraju Američka agencija za međunarodni razvoj (USAID) i Švedska agencija za međunarodni razvoj i saradnju (Sida). Tim povodom Smail Toromanović, Savjetnik Općinskog načelnika Bihaća je razgovarao sa Markom T. McCordom, direktorom Gold projekta i njegovim saradnicima.



Istaknuvši zadovoljstvo izborom Općine Bihać za regionalno čvorište projekta GOLD, Toromanović je istakao da će načelnik Općine Bihać 4. februara/veljače 2014. godine u Sarajevu svečano potpisati Memorandum o razumijevanju i na taj način ozvaničiti projekat čija je vrijednost 25 miliona dolara i ima za cilj promovisati integrisano i sveobuhvatno planiranje lokalnog ekonomskog razvoja i realizaciju aktivnosti između općina, kantona i entiteta u sektorima sa najvećim potencijalom za brz, održiv rast novih radnih mjesta.

„Općina Bihać počešćavana je što je izabrana za regionalno čvorište i ovaj izbor za nas u Bihaću znači nove mogućnosti za stvaranje novih radnih mjesta i povezivanje javnog i privatnog partnerstva na dobrobit lokalnih zajednica. Pred nama je dosta posla ali ćemo zahvaljujući GOLD projektu dobiti tehničku podršku, obuku i treninge naših kadrova zaduženih za privredu, promociju naših privrednih i ostalih potencijala, te grant sredstva za poduzetništvo“ - kazao je Toromanović. Projekat će podržavati poduzetništvo i raditi sa privatnim i javnim sektorom na realizaciji programa stručne obuke kako bi se mladi osposobili sa odgovarajućim vještinama potrebnim domaćoj ekonomiji.

POTPISAN PROTOKOL O SARADNJI IZMEĐU VOJVODINE I TUZLANSKOG KANTONA



Predstavnici Tuzlanskog kantona i Autonomne Pokrajine Vojvodina potpisali su 21. januara/siječnja Protokol o saradnji, čime je stvoren preduslov za široku regionalnu saradnju u oblasti privrede, prije svega poduzetništva, malih i srednjih preduzeća, zatim turizma, saobraćaja, kulture i poljoprivrede. Dokument je u ime Vlade Tuzlanskog kantona potpisao premijer Sead Čaušević, a delegaciju su činili Petar Simić, ministar razvoja i poduzetništva, Senaid Hadžić, ministar saobraćaja, trgovine i turizma, Sead Hasić, ministar poljoprivrede, vodoprivrede i šumarstva, Adem Šehidić, ministar obrazovanja,

nauke, kulture i sporta i Jasna Hivziefić, savjetnica premijera Tuzlanskog kantona. "Ovim protokolom otvorili smo vrata svim institucijama da mogu brže, jednostavnije i kvalitetnije uspostavljati saradnju i dogovarati projekte koje radimo. Ono što izdvajamo su aktivnosti u vezi evropskih fondova. Već imamo saradnju sa nekoliko županija iz Republike Hrvatske a zajednička je ideja da to bude jedna široka regija u kojoj bi bili mi, dvije županije iz Hrvatske, Vojvodina i Pečuh iz Mađarske koji otprilike čine širu regiju u koja ima zaista velike mogućnosti", rekao je premijer Čaušević.

Predsjednik Vlade Autonomne Pokrajine Vojvodine Bojan Pajtić naglasio je da se stvaranjem konteksta za regionalno povezivanje pravi korak ka evropskim integracijama što je danas i simbolično naglašeno pristupnim pregovorima Republike Srbije sa Evropskom unijom.

"Naše su privrede kompatibilne. Kada uzmemo u obzir činjenicu da je izvoz iz Vojvodine u BiH bio 486 miliona dolara u prošloj godini, a da je uvoz bio 103 miliona, vidimo da je izuzetno intenzivna trgovinska saradnja", rekao je Pajtić.

Delegaciju Vlade Autonomne Pokrajine Vojvodina činili su Miroslav Vasin, potpredsjednik Vlade Vojvodine i pokrajinski sekretar za privredu, zapošljavanje i ravnopravnost polova, Branislav Bugarski, pokrajinski sekretar za međuregionalnu saradnju i lokalnu samoupravu, Dejan Avdalović, savjetnik predsjednika Vlade Vojvodine, Goran Mihajlović, viši savjetnik za odnose sa javnošću u Birou za odnose sa javnošću, te Dejan Kovačević, stručni saradnik u Pokrajinskom sekretarijatu za međuregionalnu saradnju i lokalnu samoupravu.



Grb AP Vojvodina



Grb Tuzlanskog kantona

ŠVEDSKA SIDA POMAŽE EKOLOŠKI PROJEKAT U STOCU SA VIŠE OD 200.000 €



Stolac

"Stvaranje minimum uvjeta za sanitarno prikupljanje otpada u općini Stolac i uvođenje selektivnog prikupljanja otpada" naziv je projekta koji realizira općina Stolac uz pomoć SIDA-e. Projekt podrazumijeva osiguranje posuda za odlaganje otpada i uklanjanje divljih odlagališta, navodi se na općinskoj web stranici.

Također, predviđena je uspostava zelenih otoka u centru općine, kao i zamjena dotrajalih i uništenih kontejnera koji se nalaze u urbanom području općine. Trenutna pokrivenost općine organiziranim prikupljanjem otpada iznosi 88%, ali samo 20 % stanovnika zaista i koristi uslugu. Najveći problem predstavlja trenutni način prikupljanja u vrećama,

te stvaranje divljih odlagališta što predstavlja sanitarno higijenski problem.

SIDA za projekt financira kupovinu 1.720 kanti zapremnine 140 l, 38 kontejnera zapremnine 1.100 l za mješani otpad, 16 kontejnera kapaciteta 1,1 m³ i jedno vozilo od 9 t za prikupljanje otpada. Ukupna vrijednost navedenog iznosi 213.340 EUR, dok će ostale troškove - obezbjeđenje zemljišta, pripreme platoa za postavljanje zelenih otoka i sanaciju divljih odlagališta, kampanju podizanja javne svijesti, izrada brošura i letaka i kampanja za sortiranje otpada – snositi općina Stolac u ukupnom iznosu od 24.500 EUR.



SWEDEN



JABLANICA DOBILA KAMION 'AUTOSMEČAR'

U sklopu projekta podrške gospodarenja krutim otpadom, zahvaljujući grant sredstvima švedske organizacije SIDA u iznosu od 233.410 EUR, općini Jablanica isporučen je kamion "autosmečar" marke "Iveco Stralis", nosivosti 22 kubika sa potisnom pločom za prikupljanje kućnog smeća, prevoz i odlaganje.

Vozilo je opremljeno uređajem za podizanje standardnih kanti od 120 litara i kontejnera od 1.100 litara. U sklopu istog projekta tokom prošle godine, dopremljeno je 150 "malih" i 15 "velikih" kontejnera.

Potpisanim sporazumom Općina Jablanica ima obavezu da u 2014. godini uredi mjesta za odlaganje otpada, boksove za kontejnere i tzv. "zelena ostrva" za kabasti otpad na čitavom području općine Jablanica.

ZENICA PRVA U BIH PRIPREMA GEO-INFORMACIONI SISTEM ZA PRAĆENJE KLIZIŠTA

Općina Zenica u saradnji sa nacionalnim institutom za monitoring i unapređenje okoliša iz italijanskog grada Potence privela je kraju realizaciju projekta "Hidrozen 2", koji podrazumjeva uspostavu monitoringa i katastra klizišta na području općine, te formiranje stručnog tim sastavljenog od 9 članova. Riječ je o geolozima, geodetima i građevinskim inženjerima kojima su 21. januara uručeni certifikati, javila je RTV Zenica.

Projekat, ali i obuka, realizovani su od marta do decembra prošle godine. Sve ove aktivnosti preduslov su za početak saniranja postojećih i sprečavanje nastanka novih klizišta, te uspostavljanje prvog geo-informacionog sistema u BiH. Ujedno, otvorena je mogućnost za apliciranje prema pretpripravnim fondovima Evropske unije.

OTVORENA APLIKACIJA ZA NAPREDNI MEĐUNARODNI TRENING PROGRAM ZA LOKALNE LIDERKE



Savez općina i gradova Federacije Bosne i Hercegovine u saradnji sa Švedskom međunarodnom razvojnom agencijom (SIDA) i Međunarodnim Centrom za lokalnu demokratiju (ICLD) poziva lokalne liderke na međunarodni seminar posvećen izgradnji kapaciteta žena političarki na lokalnom nivou.

Seminar „Lokalne liderke“ namjenjen je lokalnim izabranim zvaničnicima – ženama (načelnicama i vjećnicama) u jedinicama lokalne samouprave.

Kroz šest faza ovog programa (uvodni seminar, dvotjedni trening u Švedskoj, rad na projektu, regionalnu konferenciju, rad na projektu i finalnu radionicu) žene liderke sa lokalnog nivoa iz zemalja jugoistočne Evrope, Afrike i Azije (Bosna i Hercegovina, Kosovo, Srbija, Makedonija, Turska, Gruzija, Ukrajina, Moldavija, Bjelorusija, Indija, Indonezija, Kina, Vijetnam, Bocvana, Mozambik, Kenija, Namibija, Južnoafrička Republika, Tanzanija, Uganda i Zambija), imaće priliku da razmijene svoja iskustva i rade na promjenama u svojim sredinama.

Uvodna radionica će se održati na proljeće 2014. godine, a dvotjedni trening u septembru/rujnu 2014. godine u Švedskoj.

Uvjet za učešće u programu, pored aktivnog političkog angažmana, je aktivno znanje engleskog jezika i suglasnost pretpostavljenog. Više informacija o treningu i apliciranju možete naći na sljedećim linkovima:

http://www.icld.se/pdf/Local_Political_Leaders_2014-2015.pdf

http://www.icld.se/pdf/Application_Form_Local_Political_Leaders_2014-2015.pdf

Potrebno je da ispunjenu aplikaciju dostavite poštom najkasnije do 15. februara/veljače 2014. godine na adresu:

Ambasada Kraljevine Švedske

Adresa: Ferhadija 19,

71000 Sarajevo, BiH (s naznakom „Na ruke: gđin Mario Vignjević“)

KORISNI LINKOVI ZA PREDPRISTUPNE FONDOVE EU:

www.southeast-europe.net

www.adriaticipacbc.org

www.interregadriatico.it

www.europa.ba

www.cbib-eu.org

www.cbc-bih-mne.org

www.srb-bih.org

www.cbc-cro-bih.net

www.programmemed.eu

www.tacso.org

www.euroinfocentar.ba

www.balkanfund.org

www.eurelmed.com

www.eacea.ec.europa.eu



SWEDEN

ICLD

Savez općina i gradova Federacije Bosne i Hercegovine

Musala 5/1
71 000 Sarajevo

Phone: ++387 33 216 502, 209 024, 209 120

Fax: ++387 33 552 810, 552 811

E-mail: dino@sogfbih.ba

Nađite nas na facebook-u

facebook | join our group +

POSJETITE NAS NA WEB-U

WWW.SOGFBIH.BA

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

NAJAVA OBILJEŽAVANJA DANA OPĆINA ZA MJESEC FEBRUAR/VELJAČA

- **08. februar/veljača - Dan Općine Odžak.** Tog dana 1996. godine prvi povratnici predvođeni policijskim snagama vraćaju se u svoje domove.
- **20. februar/veljača - Dan Općine Bužim.** Na taj dan 1995. godine Predsjedništvo RBiH je Uredbom sa zakonskom snagom formiralo općinu Bužim.
- **21. februar/veljača - Dan Općine Ljubuški.** Tog dana 1444. godine napisan je testament bogatog dubrovačkog trgovca Gojslava Orlovića u kojem se spominje dar crkvi u Ljubuškom. Smatra se najstarijim pisanim dokumentom u kojem se spominje naziv Ljubuški (Lubusia), a čuva se u dubrovačkom arhivu.
- **22. februar/veljača - Dan Općine Jablanica** i dan sjećanja na oslobođenje grada u Drugom svjetskom ratu.
- **23. februar/veljača - Dan Općine Velika Kladuša.** Ovaj datum je značajan kao sjećanje na prvo oslobođanje V.Kladuše u II svjetskom ratu kada je uspela opstati kao slobodan teritorij punih 731 dan.
- **26. februar/veljača - Dan Općine Bihać.** Na taj dan 1260. zabilježen je prvi pisani historijski trag o gradu Bihaću u Povelji ugarsko-hrvatskog kralja Bele IV, kao gradu sagrađenom na Otoku sv. Ladislava, u vlasništvu benediktinske opatije iz Topuskog. Godine 1262. proglašen je slobodnim kraljevskim gradom sa svim pravima što mu je osiguralo samostalni razvoj.
- **29. februar/veljača - Dan Općine Ilijaš.** Na ovaj dan, 1996. godine, na oslobođenu teritoriju općine Ilijaš došlo je do masovnog povratka izbjeglog stanovništva i uspostavljanja vlasti.



Ilijaš



Jablanica



Velika Kladuša



Odžak



Ljubuški



Bihać

Savez / Zajedno za uređenu i razvijenu lokalnu samoupravu